

Visoki predstavnik imenovao domaće članove Izborne komisije BiH

Visoki predstavnik Wolfgang Petritsch je danas donio Odluku o imenovanju četiri domaća člana Izborne komisije Bosne i Hercegovine koja se sastoji od sedam članova. Imenovani su Hilmo Pašić kao predstavnik Bošnjaka, Lidija Korać kao predstavnik Hrvata, Branko Perić kao predstavnik Srba i Vehid Šehić kao predstavnik Ostalih.

Visoki predstavnik je poduzeo ovaj korak kako bi osigurao da se opšti izbori u BiH mogu održati kako je predviđeno u oktobru 2002. godine.

Uloga Izborne komisije BiH je od suštinske važnosti, pošto je njen zadatak organizacija izbora. Uzimajući u obzir obim rada na administrativnim i zakonodavnim pitanjima koji treba biti obavljen prije održavanja opštih izbora, ne smije se više gubiti vrijeme do početka rada Komisije.

Na sastanku u Briselu 30. oktobra ove godine, politički direktori Upravnog odbora Vijeća za implementaciju mira su pozvali organe vlasti u BiH da odmah ubrzaju pripreme za opšte izbore, te su zahtijevali trenutačno osnivanje Izborne Komisije BiH, kao i brzu i dosljednu implementaciju preostalih odredbi u vezi sa provedbom izbora od strane vlasti BiH.

Visoki predstavnik je već 27. septembra 2001. godine imenovao tri međunarodna člana Izborne komisije (šefa i zamjenika šefa Misije OSCE-a u BiH ili osobe koje oni odrede na tu funkciju, te višeg zamjenika visokog predstavnika ili osobu koju on

odredi na tu funkciju). Sastav Izborne komisije je kompletiran današnjim imenovanjima i ona sada može početi sa radom.

Parlament BiH je usvojio Izborni zakon BiH 23. avgusta ove godine. Tekst je objavljen u Službenom glasniku 19. septembra 2001. godine, a Zakon je stupio na snagu osam dana nakon objavljivanja. U skladu sa Zakonom, četiri domaća člana Izborne komisije imenuje Privremena komisija za imenovanje i Zastupnički dom BiH. Međutim, u Zakonu je isto tako utvrđeno da će članove Izborne komisije imenovati visoki predstavnik ako oni ne budu imenovani do 15. septembra 2001. godine.

Visoki predstavnik je u više navrata pozivao nadležne organe vlasti da osiguraju uspostavu Izborne komisije i započnu sa pripremama za izbore. Zbog kašnjenja proceduralne prirode, Privremena komisija za imenovanje je bila u mogućnosti da dostavi listu od sedam kandidata tek 12. novembra. Pošto nema dovoljno vremena da se čeka zasjedanje Zastupničkog doma BiH i imenovanje domaćih članova Izborne komisije, visoki predstavnik je odlučio da sam izvrši imenovanje.

Visoki predstavnik sada očekuje od nadležnih organa da osiguraju finansiranje izbornih priprema, kao i prostorijske za rad Izborne komisije.

Imenovanje domaćih članova Izborne komisije stupa na snagu odmah. Članovi se imenuju na pet godina, ili na neki drugi period ukoliko visoki predstavnik donese takvu odluku.